

NAJZNAČAJNIJE AKTIVNOSTI U 2017/18. GODINI

Čestitka muftije tuzlanskog Behram-begovoj medresi povodom početka nove školske godine.

Povodom početka nove školske godine u Behram-begovoj medresi u Tuzli muftija tuzlanski Vahid-ef. Fazlović je uputio učenicima, muderrisima i drugim zaposlenicima čestitku u kojoj se, između ostalog, kaže:

U ime Muftijstva tuzlanskog i u svoje ime upućujem Vam čestitke povodom početka nove 2017/18. školske godine.

U prošloj školskoj godini smo često bili obradovani dobrim vijestima o uspjesima učenika Behram-begove medrese, kako u učenju i vladanju, tako i na brojnim takmičenjima i smotrama znanja. Radosni smo što je ta postignuća pratio i vanredan trud profesora u nastavi i odgoju. Želimo da se to nastavi i u ovoj godini i da ostanete prepoznatljivi kao škola u kojoj se postižu dobri rezultati.

Program povodom Nove hidžretske godine
u Zavodu za odgoj i obrazovanje

Članovi sekcije Klub humanista Behram-begove medrese su, zajedno s članovima Volonterske sekcije, posjetili Zavod za odgoj

i obrazovanje osoba s psihičkim i fizičkim smetnjama u razvoju Tuzla u utorak, 26. 9. 2017.god. Ovom prilikom izveden je prigodni program i podijeljeni su paketići za učenike Zavoda, a program su izveli članovi Horskke i Recitatorske sekcije.

Promovisana poštanska marka s motivom Behram-begove medrese

Preduzeće BH Pošta d.o.o Sarajevo, povodom obilježavanja dana Behram-begove medrese u Tuzli, objavilo je u četvrtak, 5. oktobra, prigodno izdanje poštanske marke “Behram – begova medresa u Tuzli”. Autor marke je Elvedin Kozarević, profesor informatike u Behram-begovoj medresi. Na svečanosti održanoj u povodu obilježavanja 391. godišnjice postojanja i rada Behram-begove medrese u Tuzli, u prisustvu velikog broja prijatelja ove škole, promovisana je poštanska marka koju je BH Pošta posvetila očuvanju i promociji kulturno-historijskog naslijeđa naše države. Ovom prigodom prisutnima su se obratili: muftija tuzlanski Vahid-ef. Fazlović, direktor Medrese Ahmed-ef. Hatunić, gradonačelnik Tuzle Jasmin Imamović i direktor P BH Pošta Mirsad Mujić.

Poštanska marka na kojoj je portal zgrade Behram-begove medrese u Tuzli, srušene sedamedsetih godina prošlog stoljeća, štampana je u 10.000 primjeraka, s nominalnom vrijednošću od 1,70 KM.

Svečano obilježen Dan Behram-begove medrese

U četvrtak, 5. oktobra ove godine, obilježen je Dan Behram-begove medrese u Tuzli. Program su izveli učenici i učenice Medrese, a proglašena su odjeljenja koja su u prošloj školskoj godini ostvarila najbolji uspjeh, kao i učenici koji su bili najbolji pojedinci u svojim odjeljenjima i koji su osvojili značajna mjesta na takmičenjima. Uručena su priznanja profesorima i zaposlenicima Behram-begove medrese za njihov dugogodišnji nesebični rad i trud.

Priznanja su uručena Emimi Hatunić, profesorici Bosanskog jezika, hafizu Amiru Hodžiću, profesoru hadisa i fikha i Neziru Redžiću, radniku na poslovima kontrole ulaza u Behram-begovoj medresi.

Direktor Behram-begove medrese Ahmed-ef. Hatunić uputio je čestitke učenicima i profesorima povodom Dana škole, a posebne čestitke uputio je uposlenicima i učenicima koji su dobili nagrade i priznanja.

Admir Muratović novi direktor Biblioteke „Behram-beg“ u Tuzli

Muftiju tuzlanskog Vahid-ef. Fazlovića su 10. oktobra ove godine posjetili članovi Upravnog odbora Javne ustanove Specijalna biblioteka „Behram-beg“ i direktor biblioteke Admir Muratović.

JU Specijalna biblioteka „Behram-beg“ Tuzla počela je s radom 1993. godine, a njen fond čine orijentalna zbirka, zbirka na bosanskoj jeziku i zbirka arhivske građe.

Povod za susret muftije Fazlovića sa članovima Upravnog odbora je nedavno imenovanje direktora ove ustanove Admira Muratovića. Prijemu su prisustvovali i pomoćnici muftije tuzlanskog Sead Seljubac i Muamer Zukić. Muftija Fazlović je direktoru Muratoviću čestitao imenovanje, te je naglasio važnost rada i djelovanja naših biblioteka kao važnih ustanova za razvoj i misiju Islamske zajednice.

Direktor Admir Muratović završio je Behram-begovu medresu u Tuzli 2000. godine, a studije na Odsjeku za orijentalnu filologiju na Filozofskom fakultetu u Sarajevu 2005. godine. Zvanje magistra humanističkih nauka iz oblasti lingvistike stekao je 2012. godine na Filozofskom fakultetu u Tuzli. Prevodilac je i koprevodilac brojnih radova i nekoliko knjiga s turskog i arapskog jezika. Stručni savjetnik saradnik je za arapski i turski jezik pri Pedagoškom zavodu Tuzlanskog kantona. Od 2005. g. zaposlen je u Behram-begovoj medresi kao profesor arapskog jezika. Student je trećeg ciklusa studija iz oblasti lingvistike na Filozofskom fakultetu u Tuzli. Oženjen je i otac je dvoje djece.

Behram-begova medresa pobjednik XIX sportskih susreta

U nedjelju, 15. oktobra 2017. godine, u Behram-begovoj medresi su završeni XIX sportski susreti medresa i gimnazija Islamske zajednice u BiH. Ekipe iz bosanskih medresa i Prve bošnjačke gimnazije takmičile su se u disciplinama mali nogomet, košarka, atletika, stoni tenis i šah. Bilo je to na sportskim terenima u Behram-begovoj medresi, na stadionu Tušanj i u Univerzitetnoj sportskoj dvorani u Tuzli. Sveukupni pobjednik ovogodišnjih sportskih susreta je Behram-begova medresa, čije su ekipe osvojile ukupno 126 bodova. Drugo mjesto, sa 75,3 bodova, pripalo je ekipi Medrese „Osman-ef.

Redžović“ iz Visokog, a treće ekpi Gazi Husrev-begove medrese iz Sarajeva, s osvojenih 72 boda.

Dan vakifa u Behram-begovoj medresi

Behram-begova medresa već nekoliko godina u mjesecu oktobru organizuje tradicionalni svečani program tokom kojeg se dodijele vakufname vakifima, ali je to prilika i za susret i razgovor domaćina s vakifima i prijateljima koji svojim materijalnim davanjima podržavaju rad škole. Tokom ove svečanosti prisutnima se obratio muftija tuzlanski Vahid-ef. Fazlović, koji se zahvalio vakifima i istakao da oni imaju dvije časti.

„Jedna čast je to što im je Allah, dž.š., dao nafaku, iako vakifi nisu uvijek oni koji su najimućniji. Druga čast vakifa je što su se oni Allahu, dž.š., zavjetovali, što su mu toliko zahvalni na onome što im je udijelio, pa i oni dijele i postižu ugled i čast. Vakifi su ugledni i časni ljudi u svakom vremenu,“ kazao je muftija Fazlović. Direktor Ahmed-ef. Hatunić zahvalio se vakifima i istakao kako je Dan vakifa jedan od najznačajnijih dana u Behram-begovoj medresi, koja u mjesecu oktobru ove godine obilježava 391. godišnjicu od prvog spominjanja medrese u historijskim dokumentima. Prigodan program izveli su učenici i učenice ove škole, a muftija Fazlović i direktor Hatunić uručili su vakufname novim vakifima.

Profesori Behram-begove medrese na seminaru o arapskom jeziku

Seminar ISESCO-a (Islamic Educational, Scientific and Cultural Organization) i Svjetske organizacije za afirmaciju arapskog jezika završen je 22. oktobra u Sarajevu, svečanom dodjelom certifikata. Tema seminara je bila „Metode unapređenja vještina učenja arapskog jezika kod učenika i studenata“. Seminaru su prisustvovali mr. Halil Mehanović, Mejra Numanović i Kemal Jusufović, profesori arapskog jezika u Behram-begovoj medresi.

Koncert ilahija i kasida horova medresa

Uprava za obrazovanje i nauku Rijasete Islamske zajednice u BiH i Muftijstvo travničko u suorganizaciji s Medžlisom IZ-e Bugojno i Općinom Bugojno organizirali su u dvorani Kulturno-sportskog

centra Bugojno u subotu koncert ilahija i kasida horova medresa i Fakulteta islamskih nauka u Sarajevu, uz muzičku pratnju benda Armina Muzaferije. Specijalni gost večeri bio je operni pjevač Latif Močević. Počasni gost bio je reisul-ulema IZ-e u BiH dr. Husein-ef. Kavazović, koji je uputio prigodne poruke. Hor Behram-begove medrese u Tuzli predstavio se s dvije ilahije.

Edukacija učenika prvog razreda o oralnom zdravlju

Behram-begova medresa ima saradnju s predstavnicima stomatološke službe Doma zdravlja Tuzla. Ta saradnja, između ostalog, najbolje se ogleda u redovnim stomatološkim pregledima učenika i edukacijom učenika o oralnom zdravlju. Kontinuirano, svake školske godine se planira edukacija učenika prvog razreda o oralnom zdravlju, a potom se izvrše stomatološki pregledi svakog učenika u ovom odjeljenju Doma zdravlja. Edukacija za sve učenike prvog razreda je održana 24.10. tekuće godine. Predavanje i praktične upute održavanja oralne higijene izvršili su dr. Mirjana Duspara, načelnica ovog odjela, dr. Admir Brkičević, specijalista oralne medicine i parodontologije i glavna sestra Vesna Begić. Učenici su imali priliku informisati se o svim pitanjima iz ovog domena. Drugi korak provođenja ovog vida saradnje je zakazivanje stomatološkog pregleda za sva odjeljenja prvog razreda, koji će se realizirati u mjesecu novembru.

Softa Medrese iz 1948. godine u sadašnjoj Medresi

U srijedu, 1. novembra ove godine, Behram-begovu medresu je posjetio njen bivši učenik Fahrudin Glumčević iz Srebrenika, koji se prisjetio svojih medresanskih dana iz daleke 1948. godine. S posebnim pijetetom je govorio o svojim profesorima rahmetli Hasanu Smajloviću, Šefketu Šabiću, Ahmedu Redžebašiću i dr. On se prisjetio i svoga kasnijeg životnog puta, u kojem je posebno bila važna činjenica da je završio ovu medresu. Direktor Ahmed-ef. Hatunić se gostu zahvalio na posjeti i na prisjećanju na stare dane Behram-begove medrese. Istakao je da je njegov životni put inspirativan za mnoge generacije učenika. Direktor Hatunić je gostu uručio i

Monografiju Medrese, u kojoj je objavljen i faksimil njegove svjedožbe iz 1948. godine.

Lideri o poduzetništvu, porodici i identitetu

Druga polovina oktobra i prva polovina novembra ove godine protekle su u zanimljivim susretima polaznika sekcije Liderstvo i poduzetništvo Behram-begove medrese. O temi „Kako biti uspješan?“ govorio je dr. Nermin Lapandić. Polaznici sekcije imali su priliku da se upoznaju s načinima motiviranja i postizanja ciljeva u radu. Dr. Lapandić je prenio i načine na koje mlad čovjek može doći do uspjeha, prije svega u obrazovanju, ali kasnije i u pokretanju vlastitog biznisa. Potom su učenice drugog, trećeg i četvrtog razreda 24.10. prisustvovala razgovoru s temom porodice. S njima je bio dr. Sead-ef. Seljubac, pomoćnik muftije tuzlanskog. Porodica je glavni stub društva i činjenica je da je taj stub danas ozbiljno narušen, zajednički je zaključeno nakon ovog razgovora. U utorak, 7.11., održana je tribina na temu „Čuvanje identiteta je bitna osobina lidera“. O njoj je govorio mr. Midhat Čaušević, viši asistent na grupi socioloških predmeta na Univerzitetu u Tuzli i poslanik u Skupštini Tuzlanskog kantona.

Obilježen dan roze hidžaba

Krajem prošlog mjeseca u Behram-begovoj medresi je obilježen Dan roze hidžaba. Taj dan su učenice i profesorice stavile roze mahramu i na taj način skrenule pažnju na važnost razvijanja svijesti o problemu informisanja i ranog otkrivanja raka dojke.

Obilježen Dan srednjoškolaca

Dan srednjoškolaca se tradicionalno obilježava 17. oktobra u znak sjećanja na studentske proteste, koji su održani u Pragu 17. 11. 1939. godine. Studenti su toga dana protestovali protiv nacističke okupacije, te su strijeljani bez prethodnog suđenja. Vijeće učenika Behram-begove medrese je, u saradnji s MREVUK-om, obilježilo Dan srednjoškolaca. Održana je radionica na temu „Izrada biznis plana“. Radionicu je održao predsjednik Vijeća učenika Mahmud Hrnjić, a učesnici su bili članovi Vijeća učenika. U nastavku su učenici odgledali informativni film o EU-selu. Njega provodi

MRESVUBIH, a podrazumijeva izgradnju sela, koja će sadržavati po jedan objekat napravljan u stilu država evropskog kontinenta. Također, istog dana, na Trgu slobode u Tuzli, Vijeće učenika naše škole prisustvovalo je zajedničkoj svečanosti, zajedno s ostalim članovima vijeća učenika s područja Tuzlanskog kantona.

Predstavljen rad Medrese na tuzlanskom sajmu

U četvrtak 23. 11. 2017. godine u Sportsko kulturnom privrednom centru Mejdan održan je Sajam zanimanja srednjih škola. Behram-begovu medresu na Sajmu su predstavili učenici i učenice četvrtog razreda. Svim zainteresovanima je podijeljen promotivni materijal Behram-begove medrese i ponuđene tražene informacije o načinu realizacije dnevnih aktivnosti, nastavnog procesa, te načinu upisa u Behram-begovu medresu. Cilj Sajma bio je upoznati učenike završnih razreda osnovnih škola s onim što nude srednje škole na području Tuzle.

Srednjoškolci o Danu državnosti

U Behram-begovoj medresi je 28. novembra održan program povodom Dana državnosti Bosne i Hercegovine. U programu su učestvovali: Gimnazija Ismet Mujezinović, Katolički školski centar „Sveti Franjo“ u Tuzli, Gimnazija Meša Selimović, Srednja ekonomsko-trgovinska škola i Behram-begova medresa. Srednjoškolci su govorili o Bosni i Hercegovini od njenih prvih spominjanja u dokumentima, pa sve do Agresije. Spomenuti su i događaji koji su doveli do nezavisnosti Bosne i Hercegovine. Učenik naše škole Mahmud Hrnjić održao je predavanje o Rezoluciji Bošnjaka o antifašizmu u Drugom svjetskom ratu. Učenicima su govorili i Mensur Husić, pomoćnik direktora za nastavu, i Idriz Memić, profesor historije u Behram-begovoj medresi.

Dr. Bušatlić: Upornost se isplati

U četvrtak, 30. 11. 2017. godine je u Džamiji Behram-begove medrese, poslije ikindija- namaza, proučen mevlud. Učenicima su se prigodnim riječima obratili direktor Behram-begove medrese Ahmed Hatunić i dr. Ismet Bušatlić, bivši dekan Fakulteta islamskih nauka i profesor na istom fakultetu, na predmetu Povijest islamske

kulture i civilizacije. Dr. Bušatlić je bio i s profesorima na sjednici Nastavničkog vijeća, kada je govorio o svom životnom putu. Ipak, s najviše emocija se prisjećao perioda nakon završene Medrese i svog imamskog poziva u Trebinju. Na kraju druženja prof. Bušatlić je zaključio da se upornost isplati, ako je nijet iskren i jasan.

Sportisti iz Sapne u prijateljskom nadmetanju u Medresi

Povodom Dana državnosti Bosne i Hercegovine u srijedu, 28. 11. 2017. godine, održani su prijateljski sportski susreti učenika Mješovite srednje škole iz Sapne i učenika Behram-begove medrese. Učenici su svoje sportske vještine pokazali iz fudbala i odbojke. Naša škola slavila je u oba susreta. Ovo je bila prilika da se učenici dvije škole druže i međusobno upoznaju. Da je susret bio uspješan, potvrđeno je željom da se ovakvi susreti nastave i u budućnosti.

Obilježen Međunarodni dan volontera

U utorak, 5. decembra, u Medresi je obilježen Međunarodni dan volontera. Uspješnom akcijom prikupljanja rukotvorina i kolača, učenici su pokazali duh volonterizma, te su prodajom tih proizvoda prikupljeni novac donirali u dobrotvorne svrhe. Bila je ovo prilika da učenici, ali i profesori, iskažu svoju humanost kupovinom raznih slatkiša i drugih predmeta koji su bili dio prodajne izložbe. Akcija je organizirana uz pomoć voditelja volonterske sekcije Merzije Kasumović, Merjem Modrić-Vildić i Amira Hodžića, profesora.

Medresa druga u debati

U Katoličkom školskom centru u Sarajevu je 3. 12. 2017, u organizaciji Centra za kulturu dijaloga Bosne i Hercegovine iz Sarajeva, organizirano Regionalno debatno takmičenje. Behram-begovu medresu su predstavljale dvije ekipe. U pojedinačnoj konkurenciji najbolji debatant bio je Alija Mevkić, učenik III razreda naše škole. U ekipnoj konkurenciji, naša škola je zauzela drugo mjesto. Ovim rezultatom ekipa Behram-begove medrese se plasirala i na državno takmičenje, koje će se održati u februaru sljedeće godine.

Šampioni gradskog prvenstva u košarci

U sportskoj dvorani Behram-begove medrese je 4. decembra ove godine održano Gradsko školsko prvenstvo u košarci za omladince Grupe B. U ovoj grupi su bile Mješovita srednja mašinska škola, Medicinska škola, Međunarodna srednja škola, Ekonomska-trgovinska škola, Rudarska škola, Turističko-ugostiteljska škola i Behram-begova medresa. U finale se plasirala ekipa Behram-begove medrese, kao prvoplasirana na ovom takmičenju, i ekipa Medicinske škole, kao drugoplasirana. Finalna faza ovog takmičenja održana je u martu 2018. godine.

Učenici u kasarni u Dubravama

U srijedu, 15.10 učenici četvrtog razreda naše škole boravili su u kasarni Oružanih snaga Bosne i Hercegovine u Dubravama, povodom obilježavanja Dana Oružanih snaga Bosne i Hercegovine. Oni su prisustvovali manifestaciji Dani otvorenih vrata. Učenike naše škole je u kasarni dočekaio brigadni imam Sejdalija-ef. Hrnjić. Učenici su imali priliku da se upoznaju s osnovnim informacijama vezanim za nastajanje i rad Oružanih snaga Bosne i Hercegovine. Upoznati su s raspoloživom tehnikom i naoružanjem.

Timski rad je preduslov uspjeha

U ponedjeljak, 4. decembra tekuće godine, održana je radionica na temu „Važnost timskog rada u liderstvu i poduzetništvu“. Obuku je, za 60 članova sekcije, održao dr. Nermin Lapandić. Realizirana aktivnost je u sklopu planiranih aktivnosti sekcije „Liderstvo i poduzetništvo“. Neki od zaključaka radionice jesu da lider treba znati kompetencije članova svog tima te da se do uspjeha dolazi postavljanjem adekvatnih članova na određene pozicije.

Predstava "Behram-beg" izvedena u Sarajevu

U petak, 8. decembra, gosti tradicionalne manifestacije Medžlisa IZ-e Sarajevo Dani o Allahovom Poslaniku "Selam, ya Resulallah" bili su učenici Behram-begove medrese iz Tuzle. Veliki broj prisutnih imao je priliku pogledati premijerno izvođenje dramskog prikaza o Behram-begu i njegovoj medresi, pod nazivom "Behram-beg", u izvedbi učenika ove medrese. U dramskom prikazu "Behram-beg"

predstavljen je Behram-beg, osnivač ove medrese, i neke faze iz nje-ne bogate prošlosti. Scenario i režiju za ovu predstavu potpisuje profesorica Emina Hatunić. Prisutnima je govorio i Ahmed-ef. Hatunić, direktor Medrese, koji je u kratkim crtama predstavio ovu najstariju odgojno-obrazovnu ustanovu u sjeveroistočnoj Bosni. Glavni imam Ferid-ef. Dautović se zahvalio učenicima Behram-begove medrese na premijernom izvođenju ovog prikaza o Behram-begu upravo u okviru ove manifestacije. Dramski prikaz je izveden u prepunoj sali Doma armije u Sarajevu.

Behram-begova medresa prva u vrednovanju srednjih škola Tuzlanskog kantona

Pedagoški zavod Tuzlanskog kantona je na svojoj zvaničnoj web-stranici (pztz.ba), u kategoriji Srednje obrazovanje, potkategoriji Vrednovanja škola, objavio rezultate vrednovanja srednjih škola na području Tuzlanskog kantona. U rangu svih srednjih škola, Behram-begova medresa u Tuzli je zauzela prvo mjesto, s ukupno ostvarenih 7.273,44 bodova, ispred drugoplasirane Srednje muzičke škole Tuzla i trećeplasirane Mješovite srednje škole Tuzla. Vrednovanje svih srednjih škola na području Tuzlanskog kantona vršili su zaposlenici Pedagoškog zavoda Tuzlanskog kantona, a po Instrumentariju Zavoda.

Fadil Umihanić osvojio zlato na Yaleu

Fadil Umihanić je najtrofejniji učenik naše škole. Posljednje medalje je osvojio na World Scholar's Cup završnom takmičenju, koje je održano u novembru ove godine na Yale univerzitetu u Sjedinjenim Američkim Državama. Riječ je o prestižnom svjetskom takmičenju koje obuhvata 40 zemalja svijeta i ujedinjuje mlade učenike koji se nadmeću u općem znanju iz nekoliko kategorija. Na takmičenju je osvojio dvije zlatne i četiri srebrne medalje. Takmičenje koje je prethodilo ovom održano je u julu i augustu u Hanoju, Vijetnam, gdje je on osvojio nekoliko medalja.

Učenici tuzlanskih srednjih škola razgovarali o Muhammedu, a.s.

Prisjećajući se rođenja Muhammeda, a.s., učenici više srednjih škola iz Tuzle su 20. 12. 2017. godine u Behram-begovoj medresi u Tuzli razgovarali o brojnim aspektima njegova života. Toga dana je organiziran okrugli sto o Muhammedu, a.s. Učestvovali su učenici iz škola: Gimnazija Meša Selimović Tuzla, Gimnazija Ismet Mujezinović Tuzla, Gimnazija Živinice, Medicinska škola Tuzla, Građevinsko-geodetska škola Tuzla, JU MS Hemijska škola Tuzla i Behram-begova medresa Tuzla. Učenici su sa svojim profesorima govorili o različitim aspektima misije Poslanika, a.s., što je u konačnici dalo zaokruženu sliku o njegovu životu.

Obilježena 20. godišnjica Misaka

U četvrtak, 21.12.2017. godine, održan je svečani program povodom 20 godina postojanja učeničkog lista Misak. U programu se obratio direktor Behram-begove medrese Ahmed Hatunić, koji je uručio priznanja dosadašnjim urednicima Misaka i koordinatorima lista. Specijalno priznanje uručeno je muftiji tuzlanskom Vahid-ef. Fazloviću, utemeljitelju Misaka. Prisutnima su se obratili bivši urednici ovog lista, prvi urednik dr. Vedad Gurda i urednik dr. Mirza Sarajkić. Prvi broj Misaka izašao je 1997. godine i od tada kontinuirano izlazi već 20 godina. Do sada su izašla 83 broja, a promijenila su se 24 urednika.

Đozić o genocidu

U utorak, 19.12.2017. godine, dr. Adib Đozić održao je predavanje učenicima na temu „Genocid kao bitna sadržajnost historije Bošnjaka“. Prof. Đozić je istakao da su Bošnjaci stari narod koji ima svoju kulturu koja je autohtona i autonomna. Historija Bošnjaka obilježena je i genocidom kao najstrašnijim zločinom. Zaključeno je da se Bošnjaci moraju boriti znanjem protiv svakodnevne kriptozicije njihove historije i kulture.

Hafiska dova Amiru Hodžiću, profesoru Behram-begove medrese

Hafiska dova Amiru Hodžiću, profesoru Behram-begove medrese, proučena je u srijedu 27. decembra u džamiji Medrese. Od 2000. godine pa do danas, među učenicima i profesorima Behram-begove medrese promovisano je 55 hafiza. Hafiz Hodžić je hifz položio 20. januara 2017. godine pred Komisijom za polaganje hifza Rijaseta IZ-e u BiH. Muhaffizi Amir-ef. Hodžiću su bili imam hafiz Husein-ef. Smajić i profesor Kiraeta u Behram-begovoj medresi hafiz Mirnes-ef. Spahić, pred kojim je i završio hifz, a kojem je ovo 30. kandidat kojeg je izveo u zvanje hafiza Časnog Kur'ana. Prisutnim džematlijama obratili su se prigodnim riječima: izaslanik Reisul-uleme Islamske zajednice u BiH dr. Dževad Šošić, muftija tuzlanski Vahid-ef. Fazlović, direktor Uprave za obrazovanje i nauku Rijaseta IZ-e u BiH Ibrahim Begović i direktor Behram-begove medrese Ahmed-ef. Hatunić.

Maida Razić 57. hafiz Behram-begove medrese

Hafiska dova Maidi Razić, učenici Behram-begove medrese, proučena je u utorak, 30. januara, u džamiji Medrese. Ona je 57. hafiz među učenicima i profesorima ove škole u periodu od 2000. godine do danas. Hafiza Razić je hifz položila 8. januara 2018. godine pred Komisijom za polaganje hifza Rijaseta IZ-e u BiH. Muhafiza Maidi Razić je Amena Jusufović, profesorica u Behram-begovoj medresi, kojoj je ovo prvi kandidat kojeg je izvela u zvanje hafiza Časnog Kur'ana. Muftija tuzlanski Vahid-ef. Fazlović je u svome obraćanju čestitao hafizi Razić, njenim roditeljima Muhamedu i Amiri, muhafizi, mualimu Ibrahim-ef. Softiću, profesoricama i profesorima, kao i učenicama i učenicima Medrese. Kazao je kako su hafizi znak da su Bošnjaci odgovorni čuvari svoje vjere. U ime Reisul-uleme Islamske zajednice u BiH uručio je diplomu hafizi. Prisutnima su se obratili i Seid-ef. Eminović, šef Odjela za osnovno i srednje obrazovanje Uprave za obrazovanje i nauku Rijaseta IZ-e u BiH, i direktor Behram-begove medrese Ahmed-ef. Hatunić.

Magistrirao profesor Ervin Sejdinović

U ponedjeljak, 29. 1. 2018. godine, na Filozofskom fakultetu Univerziteta u Tuzli magistrirao je Ervin Sejdinović, profesor

sociologije u Behram-begovoj medresi. Tema njegove magistarske radnje je „Velikosrpski nacionalni programi i genocid nad Bošnjacima“. Rad je odbranio pred komisijom u sastavu: dr. Adib Đozić (mentor), dr. Zlatan Delić i dr. Mensur Husić. Odbrani su prisustvovali i muftija tuzlanski Vahid-ef. Fazlović, direktor Medrese Ahmed Hatunić, Sead Seljubac, kao i radne kolege iz Behram-begove medrese. Ervin Sejdinović rođen je u Tuzli 16. 12. 1992. godine. Završio je Behram-begovu medresu u Tuzli i Filozofski fakultet u Tuzli. Po završetku dodiplomskog studija upisao se na master studij sociologije.

Kruna ljubavi i ponosa

Svjetski dan hidžaba je obilježen 1. 2. 2018. godine u Behram-begovoj medresi, kada je izveden prigodan program. Ranije je raspisan literarni konkurs na temu „Kruna ljubavi i ponosa“. Prvo mjesto među učenicama osvojila je Jasmina Ejubović, učenica III razreda, drugo mjesto Emra Jukić, učenica drugog razreda, a treće mjesto Irma Muminović, učenica trećeg razreda. U okviru ove manifestacije održana je i prezentacija panoa vezanih za ovu temu. Inače, od 1. februara 2013. godine na Zapadu se obilježava Svjetski dan hidžaba.

Lideri u posjeti SSST-u, Bošnjačkom institutu i Gazi Husrev-begovoj biblioteci

Polaznici sekcije Liderstvo i poduzetništvo su u subotu, 10. 2. 2018. godine, posjetili Univerzitet Sarajevo school of science and technology. Ovom prilikom učenici su razgovarali sa osnivačem ovog univerziteta, akademikom Ejupom Ganićem, o načinu upisa, programu studija i o njegovoj političkoj ulozi u periodu agresije na Bosnu i Hercegovinu. Kasnije su obišli učionice i sale za predavanje, te biblioteku ovog Univerziteta. Ova posjeta prijestolnici je iskorištena i za obilazak Bošnjačkog instituta. Ovo je bila prilika da se učenici upoznaju s likom i djelom Adil-bega Zulfikarpašića i s njegovom ostavštinom. Nakon ove posjete obišli su i Gazi Husrev-begovu biblioteku. Učenici su se upoznali s historijom biblioteke, te su zatim pogledali i opremu kojom su se uposlenici služili u toku Agresije na našu domovinu.

Edukacija o liderstvu za osnovce

U četvrtak, 15. 2. 2018. godine, u Behram-begovoj medresi održana je edukacija za učenike završnih razreda osnovnih škola Grada Tuzle iz oblasti liderstva. Edukacija je organizirana u saradnji s menadžmentom osnovnih škola i nastavnicima islamske vjeronauke. Edukaciji je prisustvovalo 75 učenika. Učenicima se obratio Mensur Husić, pomoćnik direktora za nastavu, ukazavši na značaj ovih vrsta edukacije za mlade osnovce. Predavanje je održao Bekir Šabić, profesor u odgoju u Medresi, koji je približio osnovcima znanja i vještine iz ove oblasti.

Behram-begova medresa domaćin XXI debatnog takmičenja Bosne i Hercegovine

Behram-begova medresa bila je domaćin XXI debatnog takmičenja Bosne i Hercegovine koje se održavalo od 23. do 25. februara. Organizator su Centar za kulturu dijaloga Bosne i Hercegovine iz Sarajeva i Behram-begova medresa u Tuzli. Takmičenje je u petak, 23. februara, otvorio muftija tuzlanski Vahid-ef. Fazlović koji je kazao da su mladi, kultura i dijalog budućnost naše zemlje, te da se kulturom dijaloga dolazi i do veoma važnog dijaloga među kulturama. Prisutnima su se obratili i direktor Behram-begove medrese Ahmed-ef. Hatunić, direktorica Centra za kulturu dijaloga Bosne i Hercegovine Sanja Vlasisavljević, pomoćnica Ministra za obrazovanje i nauku u Vladi Tuzlanskog kantona Mersija Jahić i koordinator ovog takmičenja Ahmed Omerović.

Na takmičenju učestvuje oko 140 učenika iz svih dijelova Bosne i Hercegovine. Naziv ovogodišnje debatne smotre srednjoškolaca iz Bosne i Hercegovine je "Jednaki u različitosti - ne diskriminaciji".

Druženje srednjoškolaca u Visokom

U Visokom je 28.2.2018. godine održan jednodnevni simpozij na engleskom jeziku za učenike srednjih škola. Tema je bila „Perspektive budućnosti: obrazovanje u Bosni i Hercegovini ili u zemljam Evropske unije“. Prisutnima se obratio Dženan Handžić, direktor medrese u Visokom, i Sencer Yeralan, dekan Fakulteta menadžmenta i javne uprave na IUS Univerzitetu u Sarajevu. Ovo je prvi simpozij ovog tipa i okupio je predstavnike osam srednjih škola:

Karadžo-begove medrese iz Mostara, Elči Ibrahim-pašine medrese iz Travnika, Behram-begove medrese, Medrese „Osman-ef. Redžović“ iz Visokog, gimnazije iz Kaknja, Visokog i Breze i Franjevačke klasične gimnazije iz Visokog. Naše dvije učenice, Esmā Alagić i Edina Hamidović, predstavile su Medresu svojom prezentacijom.

Redakcija Misaka posjetila Stav, Faktor i Radio BIR

Svoje edukativno putovanje u Sarajevo redakcija Misaka je iskoristila za posjetu redakcijama sedmičnog lista Stav, informativnog portala Faktor i Radio BIR-a. U redakciji Stava ugostio ih je Filip Mursel Begović, glavni i odgovorni urednik. Izrazio je veliko zadovoljstvo zbog ove posjete, kao i nadu da će se neko od članova redakcije Misaka nastaviti baviti novinarstvom. Objasnio je koja je uloga i misija ovog renomiranog lista. Svoju posjetu su iskoristili za obilazak uredništva i redakcije web-portala Faktor. Sejad Lučkin, glavni i odgovorni urednik web-portala, upoznao je članove redakcije Misaka s brojem zaposlenih, načinom na koji se biraju teme i kako funkcionira jedna ovakva redakcija. Nakon ove posjete učenici su obišli prostorije Radio BIR-a, gdje ih je ugostio v.d. direktor Media-centra IZ-e u BiH Nedim Hrbat. On je govorio o važnosti jednog ovakvog islamskog medija. Izrazio je želju da će upravo neko od članova redakcije Misaka imati priliku da svoje prve novinarske zadatke stiče na ovom mediju.

Obilježen Dan nezavisnosti

U utorak, 6. 3. 2018. godine, svečanim programom koji su priredili učenici drugog razreda Medrese obilježen je Dan nezavisnosti. Učenjem ilahija i čitanjem odlomaka iz raznih djela učenici su nas podsjetili na ovaj važan dio naše historije. Direktor Medrese Ahmed-ef. Hatunić u svom obraćanju rekao je da je naša domovina Bosna i Hercegovina zemlja koju treba čuvati i voljeti.

Misak u Al Jazeera Balkans

Članovi redakcije Misaka su u srijedu, 7. 3. 2018. godine, boravili u Sarajevu, u edukativnoj posjeti televizijskoj kući Al Jazeera Balkans. Melina Kamerić, zadužena za odnose s javnošću ove TV

kuće, i Almir Šećkanović, urednik programa, primili su učenike. U savremeno opremljenom studiju s najskupljom televizijskom opremom na Balkanu predstavili su način funkcioniranja ove televizijske mreže, pripremu cjelodnevnog programa i način finansiranja. Ova posjeta je upriličena kako bi članovi redakcije vidjeli kako funkcionišu proizvodnja i plasiranje vijesti u jednoj od najvećih televizijskih mreža na svijetu. Nekima od njih će ova posjeta pomoći u odluci koji fakultet da izaberu za studiranje.

Volonteri se družili sa slijepim i slabovidnim osobama

U utorak, 14. 3. 2018, članovi Udruženja oštećenog vida Tuzla družili su se sa članovima Volonterske sekcije Medrese. Realizirana je radionica kuhanja u kojoj su učenice iz Volonterske sekcije pomagale slijepim osobama da obavljaju pripreme kuhanja i serviranja. Ovo je bila prilika da se družu i bolje upoznaju s problemima, interesovanjima i potrebama slijepih i slabovidnih lica. S druge strane, osobama oštećenog vida ovakav vid druženja je prilika da podignu samopouzdanje i pomogne im u socijalizaciji. Dogovorena je saradnja, sportske aktivnosti i radionice u prostorijama njihovog udruženja. U ime udruženja, sve aktivnosti realizirane su u dogovoru s Timom Mušić, dopredsjednicom udruženja.

Evlad u posjeti Behram-begovoj medresi

U srijedu, 21. 3. 2018. godine, Medresu je posjetio Enver Tursunović, direktor predškolske ustanove „Evlad“ iz Brčkog, sa saradnicima. Delegaciju je primio Ahmed-ef. Hatunić, direktor Behram-begove medrese, sa svojim pomoćnicima. Na početku susreta on je uputio riječi dobrodošlice, te goste upoznao s historijatom ove ustanove, kao i s nastavnim planom i programom. O dosadašnjim realizovanim aktivnostima i budućim planovima predškolske ustanove Evlad prisutne je upoznao direktor Enver Tursunović, stavljajući akcenat na planove vezane za budućnost, proširenje sadašnjeg kapaciteta obdaništa i izgradnju još jednog objekta u ruralnom dijelu općine Brčko. Također se osvrnuo na probleme s kojima se susreću, te mogućnost povezivanja ovakvih obdaništa i bolju međusobnu saradnju.

Kod indonezijskog predsjednika

U periodu od 20. do 22. marta 2018. godine održano je 10. takmičenje princa Sultana ibn Abdul-Aziza El-Sauda u hifzu Kur'ana i hadisa za zemlje ASEANA i Pacifika, u najvećoj džamiji jugoistočne Azije, Istiklal džamiji. Takmičenje ima regionalni karakter, a Bosna i Hercegovina je učestvovala kao gost. Naš alumnista hafiz Emir Sinanović osvojio je 2. mjesto u kategoriji hifz cijelog Kurana, a delegaciju je vodio hfz. Abdullah Kapo. Predstavnik Bosne i Hercegovine primio je predsjednik Indonezije Joko Widodo, u predsjedničkoj palati u toj zemlji.

Održana 19. debata učenika srednjih škola

U Behram-begovoj medresi je 27. marta ove godine održana 19. debata učenika srednjih škola. Tema o kojoj su raspravljali predstavnici dvadesetak srednjih škola iz Bosne i Hercegovine, Crne Gore, Hrvatske i Srbije bila je Forsiranje apatije kao kulturnog koda. Debata se sastojala od dva dijela: revijalnog i takmičarskog. U takmičarskom dijelu najbolji iz tri grupe su se plasirali u finale. Nakon glasanja svih debatanata, učenik trećeg razreda Behram-begove medrese Alija Mevkić odnio je pobjedu u pojedinačnoj kategoriji. Neka od problemskih pitanja na koja su debatanti pokušali dati odgovor su: Šta je apatija i kako se javlja u tranzicijskim društvima? Koji su procesi u tranzicijskim društvima doveli do pojave apatije? Kakva je uloga medija, obrazovnih i drugih društvenih institucija? Da li se apatija, nezadovoljstvo, negativan stav javnosti prema svemu, kao i osjećaj potištenost pretvaraju u svojevrstni kulturni kod? Organizator i domaćin, kao i inicijator teme za ovu debatu je Behram-begova medresa u Tuzli. Učenici su bili ravnopravni u netakmičarsku i takmičarsku kategoriju.

Blagdani kao inspiracija: održani Dani porodičnih vrijednosti

U četvrtak, 29. marta ove godine, u Bosanskom kulturnom centru TK održana je 13. po redu manifestacija Dani porodičnih vrijednosti.

U prepunoj sali BKC-a učenici Medrese su učili odlomke iz Kurana, ilahije, čitali su recitacije, pjevali sevdalinke, a učestvovali su i članovi dramske sekcije. Prikazan je i film o volonterima Medrese i

njihovim posjetama Zavodu za odgoj i obrazovanje osoba sa smetnjama, dnevnom centru Koraci nade, kao i dječijem vrtiću „Aladin“. Također je, u saradnji s Pedagoškim zavodom TK, raspisan i konkurs za najbolje literarne radove za osnovne i srednje škole i poseban konkurs za učenike Medrese. Prvoplasiranima su uručene i novčane nagrade na manifestaciji. Programu su prisustvovali i visoki zvaničnici Islamske zajednice u BiH: muftija tuzlanski Vahid-ef. Fazlović, direktor Medrese Ahmed-ef. Hatunić, Seid Eminović, iz Uprave za obrazovanje i nauku Rijasetu IZ u BiH, Safija Malkić iz Uprave za vjerske poslove Rijasetu IZ-e u BiH... Također je prisustvovao veliki broj aktivistkinja iz raznih udruženja s područja Muftiluka tuzlanskog, pa i šire.

Promovirana Monografija Fakulteta islamskih nauka

U srijedu, 4. aprila 2018. godine, u Behram-begovoj medresi promovirana je Monografija Fakulteta islamskih nauka u Sarajevu. O knjizi su govorili muftija tuzlanski Vahid-ef. Fazlović, dekan Fakulteta islamskih nauka u Sarajevu dr. Zuhdija Hasanović, prodekan za nastavu dr. Ahmet Alibašić, alumnisti dr. Mensur Husić i dr. Edin Peštalić. Monografija je objavljena u suizdavaštvu s El-Kalemom, a objavljena je povodom četiri decenije rada i postojanja ove ustanove. Promocija je organizovana uz pomoć Muftijstva tuzlanskog i Medžlisa Islamske zajednice Tuzla.

Tradicionalna šetnja maturanata

U srijedu, 11. aprila 2018. godine, maturanti 342. generacije tradicionalno su prošetali kroz svoj grad. Uz pratnju roditelja, profesora, profesorica, prijatelja i učenika nižih razreda, maturanti su svoju šetnju počeli ispred Medrese, prošetali do platoa Kapije, gdje su proučili Fatihu i položili bijele ruže na spomen-mjestu ubijenoj omladini 25. maja 1995. godine od strane srpske vojske, a zatim su se uputili do Džindić-džamije i porte stare Medrese. Ova generacija broji 119 učenika. Razrednici su bili Dino Ćorović, Asmir Imamović, Mukelefa Behaderović i Amila Hasanspahić, a odgajatelji Abdullah Kapo, Edina Tokić i Mejra Numanović. Ovo je jedna od aktivnosti u zadnjoj sedmici njihovog medresanskog školovanja, a

završava se svečanom akademijom koja je održana u subotu, 14. aprila 2018. godine.

Akademija 342. generacije

U subotu, 14. aprila 2018. godine, svečanom akademijom održanom u Bosanskom kulturnom centru u Tuzli, još jedna generacija maturanata Behram-begove medrese okončala je svoje školovanje. Svečanosti su prisustvovali izaslanik Reisul-uleme Ibrahim Begović (direktor Uprave za obrazovanje i nauku Rijaseta IZ-e u BiH), muftija tuzlanski Vahid-ef. Fazlović, premijer Tuzlanskog kantona Jakub Suljkanović, direktor Medrese Ahmed-ef. Hatunić, brojni vakifi, roditelji, prijatelji i mnogobrojni gosti. Učenicima generacije proglašeni su Mahmud Hrnjić i Dženita Đulović. Ovogodišnja 342. generacija Medrese broji 119 učenika. Razrednici su bili profesori Dino Ćorović, Asmir Imamović, Mukelefa Behaderović, Amila Hasanspahić, a odgajatelji Abdullah Kapo, Edina Tokić i Mejra Numanović.

Budući vojnici i oficiri Oružanih snaga BiH

U srijedu, 11. 4. 2018. godine, u Medresi su maturantima predložene mogućnosti nastavka školovanja na vojnim akademijama u inozemstvu, a preko Ministarstva odbrane Bosne i Hercegovine. Učenicima je o akademijama govorio Muhamed Okić, sekretar Muftijstva vojnog. Učenici su pokazali veliko interesiranje za ovu temu, iskazavši želju da značajan broj njih bude vojnik i oficir Oružanih snaga Bosne i Hercegovine.

Održan Memorijalni turnir "Nurdin Gobeljić"

U srijedu, 18.4.2018. godine, u Medresi je održan tradicionalni memorijalni malonogometni turnir "Nurdin Gobeljić". Ovo je šesti turnir koji se organizira od 2013. godine, a u znak sjećanja na pre-rano umrlog učenika Behram-begove medrese Nurdina Gobeljića. Učestvovali su učenici prvog, drugog i trećeg razreda. Najbolji su bili učenici IIIb odjeljenja. Nakon turnira predata je i hatma koju su proučili učenici trećeg razreda.

Učenici posjetili Solanu

Učenici izborne nastave Hemija-Biologija su, u proteklom periodu, posjetili Fabriku soli DD Solana Tuzla. Ova posjeta predstavlja terensku vježbu u okviru praktične nastave. Učenici su u pratnji domaćina inženjera Samira Salkića obišli cijeli pogon proizvodnje soli, te tako stekli cijeli uvid u način proizvodnje i distribucije soli.

Susreti mladih lidera obrazovnih institucija Islamske zajednice u Bosni i Hercegovini

U Behram-begovoj medresi su, u periodu 25 – 26. aprila tekuće godine, održani susreti mladih lidera obrazovnih institucija Rijase-ta Islamske zajednice u Bosni i Hercegovini. Učešće su uzele četiri medrese: Behram-begova medresa, Elči Ibrahim-pašina medresa, Medresa Osman-ef Redžović, Gazi Husrev-begova medresa, te Prva bošnjačka gimnazija iz Sarajeva. Ukupno je bilo 30 učesnika. Susreti mladih lidera su organizovani na inicijativu svih medresa Islamske zajednice. Edukatori i teme radionica su: Mr. Midhat Čaušević – „Odlike lidera i liderstva“, Mr. Bekir Šabić – „Osnova liderstva“, „Uloga razmišljanja u razvoju kreativnosti“, te dr. Nermin Lapandić – „Kako postati uspješan lider“. Susrete je otvorio direktor Behram-begove medrese, mr. Ahmed-ef. Hatunić, koji je prigodnim obraćanjem istakao da su upravo učesnici ovih susreta budućnost ovog društva i države, te da kao takvi trebaju već preuzimati odgovorne pozicije u svom okruženju. Svi učesnici susreta su certificirani. Jedan od zaključaka jeste da se ovakvi i slični susreti trebaju i češće organizovati kako bi se učenici i učenice koji izražavaju afinitete na polju liderstva više povezivali i formirali zajedničke projekte.

Predramazanska večer ilahija i kasida

Večer ilahija i kasida koju su, pod pokroviteljstvom Muftijstva tuzlanskog, organizirali Medžlis Islamske zajednice Tuzla i Behram-begova medresa, održana je u srijedu, 9. maja, u Tuzli. Slušajući stihove ilahija i kasida i odabranih tekstova prisutni su podijelili radost zbog dolaska mubarek-mjeseca ramazana. Ramazansku čestitku uputio je muftija tuzlanski Vahid-ef. Fazlović. Odabrane ilahije i kaside učili su hor Behram-begove medrese, hor Medžlisa Islamske zajednice Tuzla “Gazi Turali-beg”, hor Medžlisa Islamske zajednice Živinice “Bir Bošnjak” kao i solisti Šejma Mehić, Harun

Čamdžić i Izudin Čamdžić. Nastupili su i recitatori i orkestar Behram-begove medrese.

Hafiska dova Lamiji Spahić, učenici Behram-begove medrese

Hafiska dova Lamiji Spahić, učenici Behram-begove medrese, proučena je u četvrtak, 10. maja 2018. godine, u Džamiji medrese. Od 2000. godine pa do danas, među učenicima i profesorima Behram-begove medrese promovisano je 58 hafiza. Hafiza Lamija je hifz položila u periodu od 2. do 16. aprila 2018. godine pred Komisijom za polaganje hifza Rijasetu IZ-e u Bosni i Hercegovini. Muhafiz Lamiji Spahić bio je njen otac hafiz Mirnes-ef. Spahić, kojem je ona 31. kandidat kojeg je izveo u zvanje hafiza Časnog Kur'ana. Muftija tuzlanski Vahid-ef. Fazlović je čestitao hafizi Spahić i njejoj porodici, istakavši da je podučavanje hifzu najteže ali i najčasnije podučavanje, a ove manifestacije su naš bereket i naša snaga. Izaslanik Reisul-uleme Islamske zajednice u BiH hafiz Mensur-ef. Malkić, direktor Gazi Husrev-begove medrese, uručio je diplomu hafiza Kur'ana Časnog Lamiji Spahić. Hafiz Malkić je čestitao hafizi Lamiji, koja se, kako je kazao, upisala među plemiće umeta Muhammeda, s.a.v.s. Prisutnima se obratio i direktor Behram-begove medrese Ahmed-ef. Hatunić, a dovu je proučio hafiz Edin Dedić.

Reisul-ulema na iftaru u Tuzli: Behram-begova medresa gradi novi dom za učenice

Reisul-ulema Husein-ef. Kavazović prisustvovao je iftaru koji je u subotu, 25. maja, u Behram-begovoj medresi organizovao muftija tuzlanski Vahid-ef. Fazlović. Tokom ovog iftara je predstavljen projekat izgradnje doma za učenice u kompleksu zgrada Behram-begove medrese. Kompleks zgrada, u kojima je Behram-begova medresa danas smještena, u ovoj će se godini proširiti novim spavaonicama i pratećim sadržajima za učenice. Time će uslovi boravka i školovanja oko 250 učenica Medrese biti unaprijeđeni, a njima samima biti olakšano svakodnevno ispunjavanje školskih obaveza.

Ramazanska putovanja Autobusa prijateljstva Behram-begove medrese

U okviru svojih ramazanskih aktivnosti učenici Behram-begove medrese putuju "Autobusom prijateljstva" u brojne sredine na području Tuzlanskog muftijstva i šire. Podijeljeni u dvije grupe, upoznaju se s ljudima, običajima i znamenitostima različitih džemata. Prvo ovoramazansko odredište bila je Bijeljina. Desetog dana ramazana su se u Mektebskom centru iftarili i družili s mladima iz ovog grada. Poslije teravih-namaza u Atik džamiji, izveli su program, sastavljen od učenja odabranih odlomaka iz Kur'ana, čitanja prijevoda kur'anskih ajeta i hadisa, prigodnih recitacija o blagodatima mjeseca ramazana, te ilahija i kasida. Prigodno ramazansko predavanje je održao Asmir Dorić, profesor u Medresi. Druženje je nastavljeno u Mektebskom centru, gdje je priređen i sehur.

U subotu, 26. 5. 2018. godine, sljedeća "stanica" je bio džemat Vida I, na području Medžlisa Islamske zajednice Gradačac. Iftar je bio na platou ispred džamije u ovome džematu. U prisustvu velikog broja vjernika, glavnog imama Nusreta-ef. Kujrakovića, te mjesnog imama Emira-ef. Smajlovića učenici su izveli prigodan ramazanski program. Na kraju programa je Asmir Imamović, profesor u Behram-begovoj medresi, održao predavanje.

Dvanaestog dana ramazana učenici su boravili na području Medžlisa Islamske zajednice Teočak, u džematu Jasikovac. U prelijepom ambijentu harema džamije organiziran je iftar, održan program, a Fadil Alić, profesor u Medresi, održao je predavanje. U pratnji profesora Enesa Softića, autobus se 13. ramazana zaputio u Srebrenicu. Prije dolaska u gradsku džamiju zastali su u Potočarima, gdje su posjetili Memorijalni centar Srebrenica-Potočari i proučili Fatihu žrtvama genocida. Domaćini, predvođeni glavnim imamom Damirom-ef. Peštalićem, ugostili su učenike i priredili im iftar. Program i prigodna obraćanja održani su poslije iftara. I četrnaesti dan ramazana učenici su putovali u Podrinje, tačnije u džemat Hrnjići, koji pripada Medžlisu Islamske zajednice Bratunac. Prije iftara učenici su prisustvovali učenju tevhida šehidima ovog džemata. Domaćini, predvođeni glavnim imamom Elvirom-ef. Hodžićem, za učenike i sve prisutne su priredili iftar. Program je izveden nakon akšam-namaza, a govorio je i Nedim Alić, profesor u Behram-begovoj medresi. Istu ramazansku večer, 29. maja drugi autobus je vozio učenike u džemat Modrički Lug u Modriči. S njima je bio profesor Kemal

Jusufović, a dočekaio ih je imam Nermin-ef. Šabić, imami s područja ovog Medžlisa i više od pedeset mladih ljudi ovog kraja. Nakon programa, prisutnima je govorio i glavni imam posavskog područja Safet-ef. Karahmetović.

Deveti međunarodni seminar TELTS 2018. okupio profesore engleskog jezika iz sedam zemalja

U periodu od 24. do 26. juna 2018. godine, u Behram-begovoj medresi u Tuzli je održan 9. međunarodni seminar Tuzla English Language Teaching Seminar (TE LTS 2018). Seminar je organiziran uz podršku Ambasade Sjedinjenih Američkih Država u Bosni i Hercegovini, Regionalnog ureda za programe engleskog jezika Vlade SAD-a sa sjedištem u Beogradu, Muftijstva tuzlanskog i Ministarstva obrazovanja i nauke Tuzlanskog kantona, a partneri su Behram-begova medresa u Tuzli, Pedagoški zavod TK i Udruženje profesora engleskog jezika TK. TELTS 2018. je jedinstveni trodnevni program stručnog usavršavanja na kojem je ove godine učestvovalo 107 nastavnika i profesora engleskog jezika iz osnovnih i srednjih škola iz 40 gradova s područja cijele Bosne i Hercegovine i šest zemalja iz regije: Srbije, Crne Gore, Makedonije, Albanije, Hrvatske i Slovenije. Ceremoniji zatvaranja seminara su prisustvovali i direktorica Regionalnog ureda za programe engleskog jezika Vlade SAD-a sa sjedištem u Beogradu Jen MacArthur, stručni savjetnik za kulturu i obrazovanje Kancelarije za odnose s javnošću Ambasade SAD-a u BiH Elizabeta Delalić, pomoćnica ministra za obrazovanje i nauku u Vladi TK Mersija Jahić, dekanesa Filozofskog fakulteta Univerziteta u Tuzli Nihada Delibegović Džanić, direktor Behram-begove medrese Ahmed-ef. Hatunić i pomoćnik direktora Mehmedalija Čandić, kao i predavači i učesnici seminara.

Održan jubilarni Deseti ljetni institut u Tuzli

Deseti ljetni institut u Tuzli (TSI 2018) održan je od 2. do 5. jula 2018. godine u Behram-begovoj medresi. Svečanosti zatvaranja ovogodišnjeg Instituta je prisustvovao reisul-ulema Husein-ef. Kavazović, koji je u svome obraćanju poručio mladima:

„Nemojte slušati one koji govore da je nešto nemoguće učiniti. Ako imate san, ako znate šta hoćete, moguće je ono što sanjate.

Svaki san može postati java, a mi smo danas već čuli primjere o momcima i djevojkama koji su postigli velike uspjehe. Moramo znati da ono što dajemo drugima zapravo dajemo sebi.“ poručio je re-isul-ulema Kavazović.

Muftija tuzlanski Vahid-ef. Fazlović je istakao važnost desete godišnjice Ljetnog instituta, kroz čije programe je prošao veliki broj učesnika, mladih, kao i ulogu BILD-a u njegovoj realizaciji i veliku pomoć univerziteta iz Sjedinjenih Američkih Država.

Prisutnima se obratio i direktor Behram-begove medrese Ahmed-ef. Hatunić, izvršni direktor BILD-a Christopher Bragdon i Sebastian Huber, jedan od osnivača BILD-a.

Oko 200 učesnika je prisustvovalo radionicama iz Jave, HTML/CSS, Javascript, Git, SQL i engleskog jezika. Tokom trajanja Ljetnog instituta imali su priliku čuti predavače iz Amerike, Švicarske, Velike Britanije i Bosne i Hercegovine. Svi učesnici su i certificirani. Polaznici Ljetnog instituta će imati priliku i da tokom jednogodišnje besplatne obuke nastave s usavršavanjem kako bi stekli zvanje softwar programera. Do sada je 47 osoba zaposleno u 16 različitih kompanija preko BILD-a kao softwar programeri.

TSI 2018. su organizovali Behram-begova medresa u Tuzli, Katolički školski centar „Sveti Franjo“ i BILD (Bosnia Initiative for Local Development – Inicijativa za lokalni razvoj u BIH).

Ahmed Omerović "najnastavnik" građanskog obrazovanja u Bosni i Hercegovini

U srijedu, 20. 6. 2017, CIVITAS je dodijelio posebna priznanja pojedincima i organizacijama koji su dali značajan doprinos za realizaciju vannastavnih aktivnosti građanskog obrazovanja. Na prijedlog Pedagoškog zavoda TK uručena su priznanja nastavnicima, sudijama i školama koje su dale doprinos uspješnoj realizaciji takmičenja iz praktičnog djela nastave građanskog obrazovanja "Projekat građanin" u školskoj 2017/18. godini. I u ovoj kategoriji je profesor Ahmed Omerović dobio priznanje, s obzirom da je Behram-begova medrese ove godine zauzela prvo mjesto na kantonalnom takmičenju.